

RAZVOJ ZAJEDNICE KISELJAK SA POSEBNIM AKCENTOM NA UKLJUČIVANJE ROMA (2017-2021) -INFORMATIVNA BROŠURA-



**Društveni centar Kiseljak, svečano otvorenje:
20. juna 2019. godine**

Mjesna zajednica Kiseljak kod Tuzle, smještena na obali jezera Modrac, dugo godina je bila jedna od najživljih lokalnih zajednica u Tuzli. Ovo naselje poznato po izvoru prirodne mineralne vode, po kojoj je i dobilo ime, bilo je omiljeno mjesto za izlet svih generacija Tuzlaka. Što zbog zagađenja jezera, što zbog nedostatka ulaganja u prirodne potencijale ove zajednice, Kiseljak poslije rata gubi svoj sjaj i suočava se sa brojnim problemima od očuvanja infrastrukture do kohezije lokalnog stanovništva.

Ipak, mještani Kiseljaka se ne predaju u borbi za svoje mjesto. Danas, dvadeset godina poslije, mještani Kiseljaka zajedno sa organizacijama civilnog društva koje djeluju u ovoj zajednici, savjetom mjesne zajednice, osnovnom školom, i drugim institucijama kreiraju bolje uslove življenja u ovoj zajednici. Mnogobrojne aktivnosti u ovoj mjesnoj zajednici rezultat su podrške koju mještanima Kiseljaka pruža Fondacija tuzlanske zajednice.

Prepoznavši probleme sa kojima se Kiseljak suočava, Fondacija je 2016. godine zajedno sa mještanima pristupila izradi Strateškog plana razvoja Kiseljaka koji je bio polazna tačka svih budućih aktivnosti na Kiseljaku. Definisane su ključne oblasti u kojima se želi djelovati, te su u protekle 4 godine realizirani mnogobrojni projekti koji su pomogli da Kiseljak danas bude mnogo ugodnije mjesto za život. Renovirano je izvorište mineralne vode, izgrađen je Društveni centar Kiseljak, pokrenute su inicijative zaštite okoliša kao i programi unapređenja obrazovanja i programi socijalne zaštite i zapošljavanja. Akcenat je stavljen na socijalnu inkluziju i koheziju mještana, te su pokrenute i implementirane brojne kulturno društvene manifestacije i događaji.

Lokalna grupa za razvoj Kiseljak osnovana je 2014 kroz saradnju sa FTZ i MAZ. Lokalnu grupu za razvoj Kiseljak čine: Savjet MZ Kiseljak, OŠ Kiseljak, Klub mladih Roma, FK Partizan, Kud Izvor, UG Farmer, OSKU Tunel, neformalna grupa Coompas, aktiv žena Kiseljak, sekcija penzionera, lovačka sekcija.

IZGRADNJA DRUŠTVENOG CENTRA KISELJAK

Tokom strateškog planiranja za razvoj svoje zajednice, građani su istakli potrebu za izgradnjom prostora koji bi postao centar kulturnog i društvenog života zajednice i koji bi pružiti prostor za druženje, edukaciju, izložbe, književne večeri i mnoge druge aktivnosti. Jedna od najvećih infrastrukturnih intervencija bila je izgradnja objekta društvenog centra, koji je zamišljen kao mjesto koje objedinjava rad javnog sektora, tj. savjet mjesne zajednice Kiseljak, ali i organizacija civilnog društva koje su aktivne na Kiseljaku.



Društveni centar Kiseljak, otvoren je 20. juna 2019. godine u svečanom ambijentu uz kulturno zabavni program i prisustvo 300 osoba, mještana Kiseljaka i zvanica. Prilikom otvaranja prisutnima su se obratili: Jasna Jašarević, izvršna direktorica Fondacije tuzlanske zajednice, Ellen Harte, šefica odjela za medije, kulturu i ljudska prava Ambasade SR Njemačke u BiH, Sasha Wenzell direktor i Monika Kleck supervizor Freudenberg Fondacije, Jasmin Imamović gradonačelnik Grada Tuzla i Dragan Božić predsjednik savjeta MZ Kiseljak.

Centar je izgrađen kroz partnersku saradnju Fondacije tuzlanske zajednice i Grada Tuzla. Vlasnik objekta je Grad Tuzla, a upravljanje centrom u narednih 30 godina povjereno je Fondaciji tuzlanske zajednice.

Od svog otvaranja centar djeluje kao otvoreni prostor u kojem se okupljaju građani i provode različite društvene aktivnosti. U prvih šest mjeseci rada, korisnici centra (organizacije, institucije, neformalne grupe građana), realizovali su više od 140 različitih aktivnosti, sastanaka, edukativnih radionica i događaja. U centru su se provodile edukativne radionice na različite teme: od upoznavanja o rodnoj ravnopravnosti, prevenciji ovisnosti za mlade, zaštiti reproduktivnog zdravlja, radionica za izgradnju životnih vještina, kreativnih radionica za djecu i mlade, do organizacije građanskih foruma, likovnih izložbi, književnih večeri i druženja. U prvih šest mjeseci rada centar je imao 567 jedinstvenih korisnika.



U centru je smješten Matični ured i ured Mjesne zajednice Kiseljak, kao i kancelarija Fondacije tuzlanske zajednice. Korisnici centra imaju na raspolaganju biblioteku, savjetovalište sa socijalnim radnicima, pedagošku radionicu za rad sa djecom i mladima, kafe kuhinju, dvije male i jednu veliku salu za sastanke i radionice. Objekat veličine 350m² je u potpunosti prilagođen osobama sa invaliditetom, a zadovoljava i standarde energetske efikasnosti.



Društveni centri imaju značajnu ulogu u generisanju znanja, resursa i potencijala u zajednici.

- Sabina Sinanović Čatibušić

OBNOVA ČITAONICA U POLJANI I ŠEVARU

Društveni domovi i čitaonice mjesta su druženja, zabave, učenja i razgovora. Pored novoizgrađenog društvenog centra obnovljeni su i objekti čitaonica u naseljima Poljana i Ševar. Objekti su obnovljeni uz volonterski angažman mještana Kiseljaka i finansijsku podršku Fondacije tuzlanske zajednice.



Prije obnove čitaonice u Poljani



Poslije obnove čitaonice u Poljani

UREĐENJE STADIONA KISELJAK

Bez dobrog stadiona nema ni kvalitetnog nogometa. Vrijedni mještani Kiseljaka okupljeni oko uprave NK Kiseljak, postepeno, korak po korak, radili su na uređenju nogometnog stadiona. Ograđivanjem stadiona zaštićena je imovina stadiona, a NK „Kiseljak“ ispunio je uslove za nastupanje u višem rangu takmičenja.

Od 2018. godine Nogometni klub „Kiseljak“ nastupa pod svojim starim imenom "FK Partizan".



UREĐENJE IZVORIŠTA „KISELJAK“



Izvorište prije renoviranja, 2017. godina



Izvorište poslije renoviranja, 2017. godina

Izvorište mineralne vode po kojem je ovo mjesto dobilo ime svakodnevno obilaze mještani ove ali i drugih zajednica. Dugo vremena bilo je to mjesto na koje se nije dolazilo samo pod vodu, nego i centralno mjesto okupljanja u zajednici, na kojem se družilo, ašikovalo i pjevalo.

Pod zubom vremena infrastruktura izvorišta je oronula i dotrajala. U skladu sa planom razvoja, stanovnici Kiseljaka uz finansijsku podršku Fondacije tuzlanske zajednice i Grada Tuzla pristupili su obnovi ovog izvorišta 2017. godine. Postavljena je nova nadstrešnica, zamijenjene su česme i cijevi za odvodnju otpadnih voda, a zatim je asfaltiran i uređen cjelokupni prostor oko izvorišta.



Pored izvorišta Kisele vode izgrađen je poligon za vježbanje i rekreaciju.

ZAJEDNIČKI PROJEKTI UČENIKA, NASTAVNIKA I RODITELJA

SAČUVAJMO NAŠE BOGATSTVO JEZERO MODRAC

Učenici iz Osnovne škole Kiseljak pokazali su kako razumiju problem ekologije. Uхватili su se u koštac s problemom koji su mnogi izbjegavali- zagađenom vodom jezera Modrac i smećem koje je preplavilo ovo jezero.

Pod rukovodstvom nastavnika, učenici su izučavali problem zagađenja jezera Modrac STEM pristupom, kojim su koristeći znanja iz matematike, geografije, informatike, hemije, biologije i demokratije napravili detaljnu analizu problema i moguća rješenja. Uz podršku Fondacije grupa učenika sa nastavnikom je posjetila branu jezera Modrac kako bi prikupili podatke koji su im nedostajali za analizu.

Da ne ostane sve na istraživanju, volonteri uključili su se i u samu akciju čišćenja. Vrijedne ruke su se organizirale i započele čišćenje obale jezera. Prikupljeno smeće svjedoči da su učenici prepoznali pravi problem i počeli ga uspješno rješavati. Na kraju su rezultati istraživanja prezentirani nastavnicima i drugim učenicima Osnovne škole Kiseljak. Prikupljeno iskustvo pomoći će učenicima da se i dalje uspješno organiziraju i urade sve što treba kako bi njihov Kiseljak ponovo zablistao starim sjajem.



Jezero Modrac, septembar 2018.




DRUŠTVENA KOHEZIJA

KISELJAČKI DANI - DOGAĐAJ ZA SVE GENERACIJE



Ništa ne okuplja i ne povezuje zajednicu kao lokalni sajmovi. „Kiseljački dani“, događaj za sve generacije, upravo je takva manifestacija i odlična prilika za druženje, zabavu, sport, kulturu i promociju domaćih proizvoda. Ova manifestacija je uspješno realizovana četvrtu godinu za redom i polako postaje tradicija Kiseljaka.

Dobrodošli su svi gosti koji žele promovirati svoje proizvode na ovoj manifestaciji ili učestvovati na kulturno-zabavnom programu.



OČUVANJE ROMSKE TRADICIJE I KULTURE

Kiseljak je zajednica u kojoj živi veći broj mještana romske nacionalnosti. Ova zajednica suočava se sa jedinstvenim problemima, ali ima i jedinstveno naslijeđe jedinstvenu kulturu. S ciljem očuvanja i promocije kulture i tradicije Roma i integracije romskog i ostalog stanovništva organizovane su brojne aktivnosti i manifestacije. Klub mladih Roma je u skladu sa svojom tradicijom organizovao svečano obilježavanje dva najveća romska praznika Đurđevdan i Aliđun. Članovi Kluba na ovaj način oživjeli su neke gotovo zaboravljene romske običaje.

U borbi protiv predrasuda Klub mladih Roma svake godine organizuje turnir na kojem učestvuju djeca iz naselje bez obzira na nacionalnu, vjersku ili bilo koju drugu pripadnost.

DAN DJEČIJE RADOSTI

Koliko stanovnici Kiseljaka brinu za svoje najmlađe pokazuje i manifestacija „Dan dječije radosti“ koju stanovnici Kiseljaka u sardnji sa OŠ Kiseljak organizuju za svoje najmlađe.

Lokalana grupa za razvoj je organizovala ovu manifestaciju dvije godine za redom, i to u decembru na Dan dječije radosti, a glavni učesnici programa su učenici Osnovne škole Kiseljak.



Na ovoj manifestaciji djeca su imala priliku nastupiti, predstaviti se svojim vršnjacima i roditeljima pjesmicama, recitacijama i glumom. Za vrhunac zabave bio je zaslužan Djed Mraz koji je djecu obradovao novogodišnjim paketićima.

KURS KUHANJA

UG Početak je u Društvenom centru Kiseljak organizovalo je kurs kuhanja kako bi pomogli majkama i mladim djevojkama da unaprijede vještine kuhanja, te da na ekonomičan način naprave zdrav i ukusan obrok. Radionice su bile usmjerene na pripremanje hranjivih obroka tradicionalne i suvremene kuhinje na pravilan način, kroz teoretsku i praktičnu nastavu.



DJEČJI FESTIVAL "VEZENI MOST"



Sa novim društvenim centrom zajednica je dobila novu biblioteku sa preko 430 knjižnih naslova i preko 700 knjiga čija je misija da unaprijedi čitalačku kulturu i kulturni život u zajednici. Biblioteka se razvija u partnerstvu sa UG Artsinteza i JUB Derviš Sušić, a pored toga i gradi partnerstva sa istaknutnim domaćim piscima.



Obzirom da je Kiseljak zajednica u kojoj živi veći broj mještana romske nacionalnosti koja ima jedinstveno naslijeđe i kulturu, u biblioteci je poseban kutak posvećen očuvanju romske kulture i tradicije kroz nabavku literature iz ove oblasti.



U oktobru 2019. u Društvenom centru Kiseljak održane su dvije aktivnosti Dječijeg festivala „Vezeni most 2019“. Obilježeno je 50 godina umjetničkog rada Šime Ešića najpoznatijeg živućeg dječijeg pisca na našim prostorima. Šimo Ešić je svom rodnom Kiseljaku posvetio mnoge stihove i pjesme, a ovom prilikom su mještani, a posebno najmlađi, kroz prigodan kulturno zabavni program odužili se Šimi čitajući njegova najbolja djela.

Na radost mališana OŠ Kiseljak, koju je pohađao i Šimo Ešić, održana je i „Pričaonica Bake Pričalice“, umjetnička radionica Srete Vide Žuljević.

IZLOŽBA „NA MARGINAMA DRUŠTVA- PRIČA ROMA“



U velikoj sali Društvenog centra Kiseljak u augustu 2019. godine otvorena je izložba „Na marginama društva- priča Roma“. Radi se o zajedničkom projektu Misije OSCE u Bosni i Hercegovini, Centra za postkonfliktne situacije u BiH, Fondacije tuzlanske zajednice i Udruženja građana „Artsinteza“.

USPOSTAVA OBRAZOVNE ALIJANSE, PEDAGOŠKE RADIONICE I SAVJETOVALIŠTA

Predstavnici 12 partnerskih organizacija i institucija formirali su obrazovnu alijansu kako bi zajednički radili na osiguravanju prilika za svu djecu da kroz kvalitetno obrazovanje i podršku zajednice povećaju šanse za kvalitetno življenje. Obrazovnu alijansu čine svi akteri uključeni u proces obrazovanja na Kiseljaku, koji daju preporuke ali i provode različite obrazovne aktivnosti, radionice, treninge, te udružuju svoje resurse kako bi djeca i njihove potrebe bile stavljene u fokus.




Kao rezultat koordiniranog rada pedagoškog tima, po prvi put su 2019. godine sva romska djeca sa Kiseljaka upisana u prvi razred osnovne škole.

Pedagoška radionica je model koji podrazumijeva partnersku saradnju svih organizacija i institucija čija nadležnost i oblast rada je zaštita djece i podrška njihovom učenju i razvoju. Glavna svrha pedagoške radionice je uključivanje i zadržavanje djece i mladih u obrazovnom procesu na način koji će osigurati da nijedno dijete ne bude izuzeto iz obrazovnog procesa niti da bude zapostavljeno tokom školovanja.

Pedagoški tim formiran je kako bi provodio mjere i inicijative koje predloži obrazovna alijansa. Pedagoški tim čine: obrazovni radnik i pedagogica iz OŠ Kiseljak, dva socijalna radnika iz Centra za socijalni rad Tuzla, tri romska medijatora iz organizacija Euro Rom, Evanđeoska crkva i Bolja budućnost, savjetnik za škole iz MIOS-a, te koordinatorka tima ispred Fondacije tuzlanske zajednice.

POMOĆ ZA PRAĆENJE NASTAVE UČENICIMA OŠ "KISELJAK"



Kako bi doprinijela smanjivanju posljedica pandemije korona virusa, Fondacija tuzlanske zajednice je nabavila i ustupila 30 tableta za romske porodice sa područja MZ Kiseljak. Ovom aktivnošću obuhvaćeno je 68 djece iz 30 porodica, koja usljed slabog imovinskog stanja nisu imala tehničke uslove da prate online nastavu, čime je povećan rizik od ranijeg napuštanja obrazovanja.

Nabavljeni tableti stavljeni su kao resurs biblioteke u Društvenom centru Kiseljak, kako bi i nakon prestanka ove potrebe mogli biti dalje korišteni u svrhu poboljšanja kvaliteta obrazovanja. Potreba za ovakvom inicijativom prepoznata je kroz kontinuirani rad na razvijanju modela Pedagoške radionice u MZ Kiseljak, kojeg Fondacija tuzlanske zajednice provodi kroz partnersku saradnju sa Ministarstvom obrazovanja i nauke TK, a u partnerstvu sa Međunarodnim udruženjem „Interaktivne otvorene škole“ Tuzla, JU OŠ Kiseljak, JU Centar za socijalni rad Tuzla, UG Bolja budućnost, UG EURO ROM i Evanđeoska Crkva. Projekat je finansijski podržan od strane Freudenberg fondacije i za ekonomsku saradnju i razvoj, SR Njemačke.



PRIRODA JE NAŠE BOGATSTVO

"Kad se male ruke slože, sve se može, sve se može!"

Udruženje građana Farmer, JU Osnovna škola Kiseljak i članovi Lokalne grupe za razvoj Kiseljak 2018. godine realizovali su projekat „Priroda je naše bogatstvo“ čiji cilj je bio praktično obučiti učenike škole o poljoprivrednoj proizvodnji i uzgoju povrća.

BIBLIOTEKA IGRAČAKA

Od novembra mjeseca 2019. godine u Društvenom centru Kiseljak i najmlađi članovi imaju svoj kutak.

Biblioteka igračaka je resurs za porodice sa malom djecom i predstavlja prostor na kojem djeca i njihovi roditelji mogu doći koristiti igračke i knjige. Na ovaj način djeca kroz igru usvajaju vještine koje im mogu koristiti u daljem školovanju, dok roditelji mogu dobiti podršku u svojoj roditeljskoj ulozi.





*Radni sastanak
"Unaprijeđenje uslova za
razvoj turističkih potencijala
obale jezera Modrac"*

*Trening "Zagovaranje,
lobiranje i vođenje
kampanja", 2018. godina*



Glavni pokretači promjena u zajednici Kiseljak su građani koji su okupljeni u Lokalnoj grupi za razvoj zajednice, koja još od 2015. godine okuplja predstavnike svih grupa iz zajednice organizacije civilnog društva, savjet MZ, školu i neformalne grupe građana. Članovi grupe redovno se sastaju kako bi realizovali inicijative i male projekte za pozitivne promjene na nivou naselja, ali i kako bi pomogli izgradnji povjerenja u zajednici.



Osnovni trening za organizatore, 2019. godina

Fondacija pomaže građansko organizovanje u vidu edukacija i savjetodavne podrške, partnerske saradnje, finansijske podrške projektima, ali i podrške u sticanju znanja i vještina potrebnih za aktivno građanstvo. Lokalna grupa za razvoj samo u 2019. godini je imala 27 aktivnih građana, i preko 100 volontera.

SAVJETOVALIŠTE

U zajednici je oformljeno Savjetovalište za građane, a sa ciljem da doprinese ličnom razvoju pojedinaca, te razvoju zdravih i funkcionalnih porodica. Savjetovališni tim čine dva socijalna radnika JU Centar za socijalni rad i tri romska medijatora iz partnerskih organizacija UG Euro Rom, UG Bolja budućnost, Evanđeoska crkva.

U 2019. godini usluge savjetovališta koristilo je 147 osoba sa područja MZ Kiseljak. Socijalni radnici pružili su 275 usluga iz svoje nadležnosti. 136 osoba podnijelo zahtjev za ostvarivanje različitih prava, a najčešće prava na jednokratnu i stalnu novčanu pomoć, prava na dječji dodatak i zdravstvenu zaštitu.



Kroz radu u Pedagoškom timu, Romski medijatori su tokom godine obavili 584 kontakta sa romskim porodicama kako bi provjerili stanje i razloge izostanaka djece iz škole, te uputili ih na rješavanje situacije.



U saradnji sa Freudenberg Fondacijom i RAA Berlin, u 2018 i 2019. godini održana su dva treninga na temu "Školska romska medijacija" sa ciljem unaprijeđenja vještina romskih medijatora i drugih profesionalaca u oblasti školske medijacije kao mehanizma za borbu protiv diskriminacije romskih učenika.

PODRŠKA SOCIJALNO UGROŽENIM PORODICAMA NA KISELJAKU

Posljedice svjetske pandemije COVID 19 osjetili su mnogi građani, a kako bi zaštitili one najosjetljivije Fondacija tuzlanske zajednice je sa organizacijama sa Kiseljaka organizovala podijelu toplih obroka za više od 300 socijalno ugroženih građana sa područja mjesne zajednice Kiseljak. Obroke je obezbijedila organizacija Međunarodni forum solidarnost Emmaus, a isporuka u MZ Kiseljak izvršena je uz podršku Udruženja žena Romkinja Bolja budućnost, Udruženja Euro Rom, Evanđeoske crkve i Savjeta mjesne zajednice Kiseljak.



Fondacija je donaciju kompanije Violeta d.o.o. zajedno sa paketima Udruženja Crveno Bijela Crvena Radost Tuzla, isporučila onima kojima je pomoć najpotrebnija. Uz podršku partnerskih organizacija Evanđeoska crkva i UG Bolja Budućnost distribuirani su donacijski paketi (mlijeko i prehrana za dojenčad, pelene i higijenske potrepštine) pomoći za 28 beba sa područja MZ Kiseljak. Takođe uz pomoć kompanije Violeta, a na inicijativu LGZR Kiseljak obezbijedili smo pomoć za Ambulantu MZ Kiseljak. Uposlenicima ove ambulante higijenski proizvodi koristiće u svakodnevnom radu.

PODRŠKA MLADIMA

Pružiti podršku mladima oduvijek je dio misije Fondacije tuzlanske zajednice, posebno u zajednicama kao što je Kiseljak koje se suočavaju sa brojnim izazovima. U skladu s tim u ovoj zajednici organizirani su brojni treninzi i radionice za mlade. U 2018. godini održan je trening „Liderstvo i aktivizam mladih“ na kojem je grupa mladih jačala svoje liderske vještine i učila o važnosti uključenosti građana u razvoj zajednice. Trening „Liderstvo i aktivizam mladih“ i trening „Različiti, a isti“ otvorio je među mladima na Kiseljaku teme razlike između kultura, preprekama u međukulturalnoj razmjeni, kao i načinima za uspješno djelovanje u multikulturalnoj zajednici. Osim toga, za mlade su organizirani i različiti forumi gdje su mladi iz Kiseljaka imali priliku razgovarati sa drugim aktivnim mladim ljudima, gradskim službenicima zaduženima za mlade, a sve to kako bi se upoznali sa aktivizmom mladih i aktivirali u svojoj zajednici. Pokazalo se da su treninzi i forumi bili uspješni jer su se mladi aktivirali kroz formalne i neformalne omladinske grupe, te uključili u rad Lokalne grupe za razvoj gdje glasnije zagovaraju za potrebe mladih i provode male omladinske inicijative. Pored toga, osnovano je i novo odmladinsko udruženje Klub mladih Roma, dok je postojeće omladinsko udruženje Osku Tunnel obnovilo članstvo.



KLUB MLADIH ROMA

Uz podršku Fondacije tuzlanske zajednice mladi su оформili na Kiseljaku Udruženje "Klub mladih Roma". Udruženje je u kratkom periodu organizovalo brojne aktivnosti koje promovišu romsku kulturu i tradiciju, kao i aktivnosti koje su usmjerene na promociju zajedništva i tolerancije.

Kako bi povećali stepen zaposlenosti žena i mladih na području mjesne zajednice Kiseljak sprovedene su edukacije o osnovama poduzetništva za mlade i žene sa područja Kiseljaka. Odobrena je podrška za pokretanje dva mala biznisa i 11 prihodovnih aktivnosti domaćinstva.



Firma EE Global Vision doo, osnovana je u julu 2019. uz finansijsku podršku Fondacije tuzlanske zajednce. Firma se bavi uvozom i prodajom roba široke potrošnje poznatih proizvođača.

“Najveći izazovi jednog mladog poduzetnika na početku biznisa su finansije i kako se održati u poslovnom svijetu. Veliki su troškovi, nameti i ostale obaveze, koje ako želite raditi pošteno, morate plaćati u roku”

Elvedin Kamberović vlasnik Firme EE Global Vision doo



Sabina i Senada Muratović odlučile su se za plasteničku proizvodnju povrća. Na ovaj način Sabina i Senada će svojoj porodici obezbijediti dodatne prihode.



Porodice Osmanović i Suljić su se odlučile za uzgoj ovaca.

ZAJEDNO KREIRAMO ZAJEDNICU PO NAŠOJ MJERI!

Inicijative i aktivnosti predstavljene u ovoj brošuri realizovane su u periodu od decembra 2017 do decembra 2020. godine i dio su aktivnosti realizovanih u okviru projekta "Razvoj zajednice Kiseljak sa posebnim akcentom na uključivanje Roma" kojeg je implementirala Fondacija tuzlanske zajednice uz finansijsku podršku Njemačkog saveznog ministarstva za ekonomski razvoj i saradnju (BMZ) i Freudenberg fondacije iz Njemačke. Ove uspješne priče ne bi bile moguće bez partnera i volontera kojima dugujemo jedno veliko hvala.

- Savjet MZ Kiseljak
- JU OŠ Kiseljak
- FK Partizan UG Farmer
- OSKU Tunel
- UG Izvor
- NG Coompas
- Aktiv žena Kiseljak
- Sekcija penzionera Kiseljak
- Lovačka sekcija Kiseljak
- Klub mladih Roma
- Udruženje Roma „Euro Rom“ Tuzla
- UDR žena Romkinja „Bolja budućnost“ Tuzla
- Ženska Romska zadruga Bolja budućnost
- Evanđeoska Crkva, Tuzla
- UG Artsinteza Tuzla
- MU „Interaktivne otvorene škole“ – MIOS Tuzla
- Mreža aktivnih zajednica
- UG Agora Tuzla
- UDR za djecu i mlade "Osmijeh za osmijeh"
- Centar za socijalni rad Tuzla
- Ministarstvo za obrazovanje i nauku TK
- OSCE, kancelarija Tuzla
- Međunarodni forum solidarnost Emmaus
- UG „Zemlja djece u BiH" Tuzla

Posebno hvala ide donatorima Freudenberg fondaciji i Njemačkom saveznom ministarstvu za ekonomski razvoj i saradnju (BMZ) kao i partneru Gradu Tuzla.

Izdavač: Fondacija tuzlanske zajednice

Brošuru pripremili: Ismet Sokoljanin, Lejla Osmanović i Sabina Sinanović Ćatibušić



Kontaktirajte nas: Fondacija tuzlanske zajednice, Pozorišna 13, 75000 Tuzla, Bosna i Hercegovina

tel/fax: +387 35 362 833/831, email: fondacijatz@gmail.com

Donirajte za razvoj tuzlanske zajednice



FREUDENBERG
STIFTUNG



Federal Ministry
for Economic Cooperation
and Development
BMZ

